



Pranuar / Dorezuar Prilipno / Predato Received / Delivered	26. 04 2021	1	Viti god year
Organ / Njësia Organ / Jednica Org / Unit	SKAMSHCK	2007 / 2021	Shera Kolicitna Quantity
			119



Republika e Kosovës Republika Kosova-Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVA

A.nr. 142/2021

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Jeton Koca-kryetar, Malsore Gashi-Bajraktari dhe Eshref Shabani-anëtarë, me Avdyl Bekteshi-Zyrtar i Lartë për Bashkëpunim Profesional në cilësinë e procesmbajtësit, ka shqyrtuar ankesën A.nr.142/2021 të datës 16.03.2021 të parashtruar nga me adresë Rr. "Ana Korenica", nr. 8, Matiqan, Komuna e Prishtinës, kundër organit të punësimit Ministria e Tregtisë dhe Industrisë, në çështjen juridike "Kompensim Material", duke vepruar në pajtim me nenin 6 paragrafin 1 nen paragrafin 1.1 dhe nenin 18 paragrafin 1 nen paragrafin 1.7 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës, nenin 47 dhe nenin 48 paragrafi 1 të Ligjit Nr.05/L-031 për Procedurën e Përgjithshme Administrative, dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur më datën 26.04.2021, mori këtë;

V E N D I M

Refuzohet si e pa bazuar ankesa me numër A.nr.142/2021 e datës 16.03.2021, e parashtruar nga ankuesi

A r s y e t i m

Ankuesi i punësuar në Agjencinë e Metrologjisë së Kosovës në kuadër të Ministrisë së Tregtisë dhe Industrisë, më datë 16.03.2021 ka parashtruar ankesë me numër protokolli 1165/2021 të regjistruar me numër A.nr.142/2021 në Këshillin e Pavarur Mbikëqyrës për Shërbimin Civil të Kosovës, me pretendimin ankimor për njohjen e të drejtës për kompensimin e shtesës mbi pagën bazë për kategoritë deficitare.

Këshilli i Pavarur Mbikëqyrës për Shërbimin Civil të Kosovës, me datë 19.03.2021, ka dërguar kërkesën për përgjigje në ankesë të Ministria e Tregtisë dhe Industrisë. Këshilli me datë 26.03.2021 ka pranuar përgjigjen në ankesë se bashku me provat e bashkangjitura të lëndës.

Kolegji për Shqyrtimin e Ankesave, për vërtetimin e plotë dhe të drejtë të gjendjes faktike si dhe vendosjes në mënyrë meritore, ka administruar këto prova: Ankesën me numër protokolli 1165/2021 të regjistruar me numër A.nr.142/2021 në Këshillin e Pavarur Mbikëqyrës për

Shërbimin Civil të Kosovës; Vendimin Nr.02/39 të datës 08.10.2008 të Kryeministrit të Republikës së Kosovës; Ndryshimi dhe Plotësimi i Aktit të Emërimi i datës 02.12.2019 për ankuesin; Përshkrimi i detyrave të punës për Udhëheqës i Laboratorit të Forcës së Presionit; Vendimi i datës 12.02.2016; Diplomën e datës 10.3.2003 të ankuesit; Shtojcën e diplomës së ankuesit e datës 18.09.2019; Certifikatën 28.09-02.10.2015; Certifikatën 23-26.02.2015; Certifikatën 22-26.06.2015; Certifikatën 12-16.10.2015; Certifikatën 07-11.12.2015; Certifikatën 17-21.10.2016; Certifikatë 30.03-03.04.2015; Certifikatën 14-18.12.2015; Certifikatën 08-12.06.2015; Certifikatën 02-06.02.2015; Certifikatën 19-23.01.2015; Certifikatën 14-17.09.2015; Certifikatën 17-19.08.2016; Certifikatën 25-29.01.2016; Certifikatë Pjesëmarrje e datës 10.11.2017; Certifikatën 09-13.02.2015; Certifikatën 6 dhe 7. 12.2018; Certifikatën 24-25.09.2018; Certifikatën 30-31.01.2017; Shkresë e datës 09.12.2019; E-mail i datës 16.03.2021 dhe 12.03.2021 nga B.H; E-mail i datës 12.03.2021 nga A.D; E-mail i datës 12.03.2021 nga I.LL; E-mailin e datës 25.03.2021 dhe 11.03.2021 nga B.H; Vendimin Nr. 07/19 të datës 31.07.2008 të Kryeministrit të Republikës së Kosovës; dhe Përgjigjen në ankesë e datës 26.03.2021.

Kolegji për Shqyrtimin dhe Vendosjen e Ankesave, pas shqyrtimit të të gjitha shkresave të lëndës të parashtruara nga palët ka konstatuar se ankesa e ankuesit, *është e pa bazuar, sepse:*

Bazuar në shkresat e lëndës, respektivisht Akt Emërimin e datës 03.12.2019 është konstatuar se ankuesi është i punësuar në pozitën e punës Udhëheqës në laboratorin e forcës dhe presionit në Agjencinë e Meteorologjisë së Kosovës (AMK).

me datë 16.03.2021 ka parashtruar ankesë në Këshillin e Pavarur Mbikëqyrës për Shërbimin Civil të Kosovës, me pretendimin ankimor për njohjen e të drejtës për kompensim, e shtesës mbi pagën bazë për kategoritë deficitare, sipas Vendimit Nr.02/39 të datës 08.10.2008 të Qeverisë së Republikës së Kosovës.

Kolegji për Shqyrtimin e Ankesave gjatë shqyrtimit të ligjshmërisë së pretendimeve ankimore të ankuesit, ka analizuar Vendimin Nr.02/39 të datës 08.10.2008 të Qeverisë së Republikës së Kosovës, përmes të cilit është aprovuar lista e pozitive dhe shtesave në pagë për kategori të veçanta të profesioneve deficitare në fushën e teknologjisë informativë dhe inxhinieringut, dhe Vendimin Nr.07/29 të datës 31.07.2008 të Qeverisë së Republikës së Kosovës, me të cilin është përcaktuar procedura për parashtrimin dhe trajtimin e kërkesave dhe mënyra e realizimit të shtesave për kategoritë e veçanta të profesioneve deficitare, dhe rrjedhimisht është konstatuar se aprovimi i shtesave në pagë për pozita deficitare është bërë me qëllim të ruajtjes së kategorive të veçanta deficitare të punonjësve, stimulimit të konkurrimit për profesione të veçanta deficitare dhe zbatimit të parimit të pagesës së njëjtë për punë të njëjtë në të gjitha organizatat buxhetore. Po ashtu, me këtë vendim është përcaktuar se paga bazë së bashku me shtesat mbi pagë nuk mund të tejkalojnë pagën e zyrtarëve të lartë të emëruar nga KELP-i, si dhe është obliguar Ministria përgjegjëse për Administratë Publike dhe Ministria e Financave për shqyrtimin e listës dhe standardëve kualifikuese dhe shumës stimuluese për postet e caktuara, se paku një herë në gjatë muaj.

Kuvendi i Republikës së Kosovës, me datë 13.05.2010 ka aprovuar Ligji Nr.03/L-147 për Pagat e Nëpunësve Civil, përmes të cilit është bërë përcaktimi i sistemit dhe strukturës së pagave, shtesave dhe kompensimeve të tjera për nëpunësit civilë, ndërsa me dispozitat e nenit 14 të këtij ligji është përcaktuar se: 1. Shtesat mbi pagën bazë janë: 1.1. shtesa për punë me ndërrime dhe jashtë



orarit të punës; 1.2. shtesa për kushte specifike pune; dhe 1.3. shtesa për kushtet e tregut. Përkitazi me këtë, duke u bazuar në dispozitat e nenit 27 të Ligjit Nr.03/L-147 për Pagat e Nëpunësve Civil, Qeveria e Republikës së Kosovës, me datë 24.12.2012 ka aprovuar Rregulloren Nr.33/2012 për Shtesat në Pagë dhe Kompensime të Tjera të Nëpunësve Civil, përmes të cilës ka përcaktuar kushtet dhe procedurat për shtesat dhe kompensime të tjera mbi pagën bazë të nëpunësve civilë. Me hyrjen në fuqi të kësaj rregullore janë shfuqizuar të gjitha aktet nënligjore të cilat kanë rregulluar shtesat dhe kompensimet tjera të nëpunësve civil, dhe rrjedhimisht edhe Vendimi Nr.07/29 i datës 31.07.2008 dhe Vendimi Nr.02/39 i datës 08.10.2008 i Qeverisë së Republikës së Kosovës, konstatim ky i dhëne edhe në Raportin Vjetor të Vitit 2017 të Këshillit të Pavarur Mbikëqyrës për Shërbimin Civil të Kosovës, kështu që duke u bazuar në këtë konstatim, Kolegji vlerëson se pretendimi ankimor i ankuesit për realizimin e shtesës në pagë sipas Vendimit Nr.02/39 të datës 08.10.2008 të Qeverisë së Republikës së Kosovës, është i pa bazuar.

Kolegji për Shqyrtimin e Ankesave, bazuar në dispozitat e Rregullores Nr.33/2012 për Shtesat në Pagë dhe Kompensime të Tjera të Nëpunësve Civil, përkatësisht nenin 8 të kësaj rregullore, ka arritur të konstatojë se Ministria përgjegjëse për administratë publike, në bashkëpunim me ministrinë përgjegjëse për financa, mund të kërkojë nga Qeveria që të miratojë një shtesë për kushtet e tregut për pozitat ose llojet e pozitave për të cilat niveli i pagës për personelin e ngjashëm nga organizatat dhe punëdhënësit e tjerë jashtë Shërbimit Civil është së paku 40% më i lartë sesa niveli i pagës që ofrohet nga Shërbimi Civil, e kjo shkakton vështirësi të konsiderueshme në rekrutimin dhe mbajtjen e personelit të kualifikuar për ato pozita ose lloje të pozitave në administratë publike, ndërsa institucioni për realizimin e shtesës për kushtet të veçanta të tregut duhet t'i ofrojë Ministrisë përgjegjëse për administratë publike kërkesën lidhur me arsyeshmërinë e realizimit të shtesës dhe një analizë që dëshmon vështirësitë të cilat janë hasur nga institucioni gjatë rekrutimit dhe mbajtjes së personit të kualifikuar, listën e pozitave përkatëse dhe koston vjetore të vlerësimit financiar. Shtesa mbi pagën bazë për kushte të veçanta të tregut nuk mund të tejkalojë më shumë se 50% të pagës bazë.

Udhëheqësja e Personelit në Ministrinë e Tregtisë dhe Industrisë, me datë 12.03.2021 i është drejtuar me kërkesë Departamentit të Menaxhimit të Zyrtarëve Publikë (DMZP), lidhur me të drejtën e shtesave mbi pagën bazë për pozitat deficitare, ndërsa DMZP në të njëjtën datë ka njoftuar Ministrinë e Tregtisë dhe Tregtisë, se ende nuk është themeluar Komisioni për Shqyrtimin e Kërkesave të Institucioneve të Shërbimit Civil, lidhur me kompensimin e shtesave mbi pagën bazë. Andaj, duke marr parasysh se për realizimin e shtesës në pagë për kushte të tregut, kërkohet paraprakisht aprovimi i një shtesë në pagë nga Qeveria, dhe meqenëse kjo e fundit ende nuk ka aprovuar një shtesë të tillë, Kolegji vlerëson se pretendimi ankimor i ankuesit në këtë kuptim është i pa bazuar.

Vendimi hyn në fuqi ditën e nënshkrimit nga Kryetari i Kolegjit.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë/ Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk ndalon ekzekutimin e këtij vendimi

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.142/2021

Avdyt BEKTESHI

Zyrtar i Lartë për Bashkëpunim Profesional



Vendimi i dërgohet:

- Ankuesit
- Sekretarit të Përgjithshëm të Ministrisë së Tregtisë, Ndërmarrësisë dhe Industrisë;
- Udhëheqësit të Burimeve Njerëzore të Ministrisë së Tregtisë, Ndërmarrësisë dhe Industrisë;
- Arkivot të KPMSHCK-së;

